



PROCESVERBAL

Nga mbledhja e rregullt e Kuvendit Komunal të Rahovecit, e mbajtur më **29.05.2020**, me fillim në ora **10:00**. Mbledhjen e kryesoi: Kryesuesi i Kuvendit z. **Afrim Dina**. Konstatohet se kuorum, për mbajtjen e mbledhjes kemi:

Kryesuesi – Fillimisht më lejoni t'iu përshëndes, i nderuar Kryetar i Komunës z. Smajl Latifi, nënkryetar i Komunës z. **Fatmir Iska**, të nderuar kuvendarë, drejtor të drejtorive Komunale, përfaqësues të mediave dhe ju gjithë të pranishëm.

Të nderuar kuvendarë, për këtë mbledhje sot propozojmë këtë :

REND DITE

1. Shqyrtimi dhe aprovimi i Procesverbalit nga mbledhja e kaluar,
2. Pyetjet dhe përgjigjet në pyetjet e kuvendarëve,
3. Shqyrtimi dhe miratimi i propozim vendimit për bartjen e tejkalimit të të hyrave vetanake nga viti 2019,
4. Shqyrtimi dhe miratimi i propozim vendimit për dhënien e pronës komunale në shfrytëzim afatgjatë,
5. Shqyrtimi dhe miratimi i propozim vendimit të Kryetarit të Komunës për dhënien e pronës së paluajtshme – lokaleve afariste të Komunës në shfrytëzim personave juridik,
6. Shqyrtimi i raportit të DKA-së për ecurinë e zhvillimit të mësimi online/ në distancë

Kryesuesi – Të nderuar kolegë kuvendarë, a jeni për këtë rend dite. Konstatohet se unanimisht aprovohet rendi i ditës. Kalojmë në pikën e parë të rendit të ditës:

1. Shqyrtimi dhe aprovimi i Procesverbalit nga mbledhja e kaluar.

Ali Morina – Faleminderit kryesues, i nderuar kryetar, nënkryetar, drejtorë të drejtorive, kolegë asambleistë, përfaqësues të mediave. E kam një vërejtje të vogël, faqe 10 te fjalimi im konkretisht te rreshti i tretë, kur kam thënë se në 3-mujorin e dytë të këtij viti do të kemi pak vështirësi për shkak të pandemisë, ku kam thënë pak vështirësi në realizimin e të hyrave për shkak të pandemisë pra vetëm ky përmirësim të bëhet. Faleminderit

Fehmi Cena – Faleminderit kryesues, përshëndetje për të gjithë të pranishmit në sallë. Edhe unë kam një ndërhyrje në faqe 11, mendoj se kanë ndodhur 2 apo 3 gabime teknike tek fjalimi im, tek rreshti im, po e

lexoj fjalinë, tek tatimi në pronë mendoj se është element shumë i rëndësishëm sepse të hyrat nga tatimi në pronë është më obligatorë, e që duhet të jetë me indikatorë me i mirë që e vlerësoj punën e qeverisë lokale. Faleminderit!

Sali Sallteku – Siç e thanë edhe parafolesit më parë, unë e di që tash ka edhe lektor, mendoj se ka shumë gabime dhe kjo nuk duhet të ndodh por megjithatë pasi e keni lektorin është mirë me pas një kontrollë më të detajizuar pasi është një dokument dhe duhet ruajtur pak më mirë edhe me u shkruajt më mirë, nuk po dua me kritikua procesmbajtësin mirëpo seriozisht janë fjalitë pa kuptim. Faleminderit shumë!

Rasim Fazliu – Përshëndetje kryesues, kryetarin, nënkryetarin, drejtorët dhe gjithë pjesëmarrësit në sallë. Në faqe 19, është një gabim i vogël teknik që me siguri e humb kuptimin e fjalisë, tek diskutimi im është fjalia e dytë ku thotë do të ishte mirë të kishim ardhur të përgatitur në këtë mbledhje sepse jemi të, duhet me qenë papërgatitur kurse këtu është e shkruar të përgatitur pra do të ishte mirë të ishim ardhur të përgatitur në këtë mbledhje sepse jemi të (pa)përgatitur. Faleminderit!

Kryesuesi – Atëherë se pari unë do të ju kërkoj falje pasi mbledhjen e kaluar e kemi mbajtur në sallën e Shtëpisë së Kulturës „Mensur Zymberaj,, dhe ka pas mundësi që gjatë incizimit nuk është dëgjuar mirë për shkak të mungesës së zërimit, kur dihet se incizimi është bërë me telefon dhe kjo ka shkaktuar shumë probleme. Sigurisht edhe sekretaria duhet me krye procesverbalin me kohë, në mënyrë që lektorimi me përfundua me kohë. Faleminderit për vërejtjet, sigurisht që do t'i përmisojnë gjitha vërejtjet e bëra. Atëherë nëse nuk kemi tjerë të lajmëruar rreth procesverbalit, e qesim në votim. Konstatoj se unanimisht aprovet pika e parë e rendit të ditës. Kalojmë në pikën e dytë të rendit të ditës:

2. Pyetjet dhe përgjigjet në pyetjet e kuvendarëve.

Fehmi Hoxha – Faleminderit shumë kryesues, përshëndetje për ju, kryetarin, nënkryetarin, drejtorët e ekzekutivit, kolegë asamblistë, media dhe gjithë ju të pranishëm. Unë vazhdimisht jam duke kërkuar qysh në seancën e tretë disa informata dhe nuk po kam ashtu siç jemi dakorduar se duhet të përgatiten. Unë besoj se drejtori i Zhvillimit Ekonomik e ka përgatitë informatën të cilën e kam kërkuar para tri seancave kryesisht edhe në seancën e kaluar për bizneset të cilët kanë pas të ndaluar në bazë të vendimit të Qeverisë ose Ministrive përkatëse që ka qenë një vendim antikushtetues mirëpo në bazë të asaj nuk kanë punuar bizneset. Po ashtu edhe një informatë, të formohet një komision edhe të dalin me pa se sa lokale afariste n'fakt kafiteritë, frizeret, zejtarët të cilët nuk kanë pasur të drejtë me punua edhe që kemi kërkuar, fakt e kam hapur si temë që ta diskutojmë bashke edhe të marrim një vendim në bazë të mundësive që Kuvendi Komunal me marr një vendim se bashku me kryetarin dhe t'i subvencionojmë ata. Një të tillë është mirë nëse drejtori e ka edhe me dal me na tregua që aktualisht komisioni është deshtë të formohet dhe me shkuar prej lokalit në lokal me pa sa janë ata por jo sa janë të regjistruar sepse aty janë kode të ndryshme dhe kurrë nuk mundemi me bo një statistikë të atillë edhe me marr ndonjë raport të atillë, kjo ishte e para. E dyta, në seancën e kaluar kërkoja që në këtë seancë të hyj në rend të ditës duke marr për bazë që komuna po keq klasifikohet në bazë të borgjeve të painkasuara, pasi kemi shumë biznese të cilat janë të regjistruara dhe janë të shuara dhe kërkoja atëherë që të merret këtu një vendim që bashkë ta diskutojmë dhe të marrim një vendim që të çlirojmë edhe komunën edhe bizneset „ekzistuese,, bizneset që janë vetëm të regjistruara dhe të ju falim atyre, njëkohësisht propozova që 50% të bizneseve ekzistuese që kanë obligime t'iu falim edhe ne të inkasojmë rreth gjysmë milioni euro, që n'fakt mbi 1 milion kanë borxh dhe asnjë centë nuk kemi dhe pasqyra jonë e klasifikimit të del pozitive. Nëse nuk keni pasur kohë me u përgatitë, ju lutem që ta përgatiteni dhe të dilni me një propozim pasi kam të drejtë si kuvendarë edhe në bazë të rregullores së Kuvendit me propozua, kështu që qitni propozimin në votim dhe nëse nuk kalon atëherë nuk ka problem.

Nuk po kërkoj për këtë seancë me qitë por servona të gjitha informatat dhe të shohim se çka mundemi me bo. Faleminderit!

Florida Bajraktari – Faleminderit kryesues, përshëndetje për te gjithë pranishmit. Unë desha me bo një pyetje rreth ndërtimit të serave. Pra në buxhetin e miratuar për vitin 2020, njëri prej kodeve buxhetore ka qenë edhe ndërtimi i serave me participim ku janë paraparë 200,000 euro. Desha të di se çka është bërë me serat pasi jemi gati në fillim të qershorit dhe desha me pyet se a do të munden t' i shfrytëzojnë përfituesit serat për vitin 2020, kur dihet se buxheti është ndarë për këtë vit e jo për vitin 2021. Kërkoj nga drejtori të na jep sqarime se kur do të filloj ndërtimi i serave edhe a është shpallë tenderi për ndërtimin e serave me participim?

Fehmi Cena – Unë po dua me shtrua një çështje që ka të bej me fushën e shëndetësisë në komunën tonë, për komunën e Rahovecit. Është fjala për punëtorët shëndetësor me kontratë të përkohshme sipas marrëveshjes Caritas Kosova me Komunën e Rahovecit. Sipas kësaj marrëveshjeje në komunën e Rahovecit në shëndetësi janë punësuar rreth 45 punëtorë shëndetësorë mjek, infermier. Problemi është se ata nuk janë paguar për 3 muaj pra mars, prill dhe tash maj, që shumica prej tyre kanë punuar edhe gjatë periudhës së pandemisë me Corona virus Covid-19 me punëtorët e tjerë të rregullt të shëndetësisë. Ata kanë filluar ta shprehin me të drejtë shqetësimin e tyre për mos pagesë nga Komuna. Unë si këshilltarë i këtij kuvendi e ndaj shqetësimin me këta profesionistë shëndetësorë për mos pagesë për punën e tyre 3 mujore për këtë vit. Kujtoj se Komuna përmes këtij Kuvendi Komunal ka ndarë për këtë projekt një shumë të buxhetit afër 200,000 euro apo me saktësisht 195,198,00 euro. Mendoj se këta punëtorë i kanë plotësuar të gjitha parakushtet për tu kompensuar për punën e bërë. Pyetja ime, është si qëndron puna me këta punëtorë, pse nuk janë kompensuar për këtë periudhë kohore për punën e tyre të kryer, pse nuk kanë kontrata. Faleminderit?

Artan Asllani – Faleminderit kryesues, i nderuar kryetar, nënkryetar, kuvendarë, kolegë drejtorë. Në pyetjen të cilën e ngriti si shqetësim i nderuari kuvendari Fehmi Hoxha është e vërtetë mirëpo nuk kemi mundur me marr informata të sakta, për arsye se ne i kemi informatat e sakta se sa biznese i ka komuna e Rahovecit, po ashtu e kemi edhe listën që e kemi marr nga Ministria e Tregtisë kryesisht nga departamenti i ARDK-se mirëpo nuk mundemi me ditë në detaje pa formimin e një komisioni i cili del në vend ngjarje dhe bën verifikimin e bizneseve që nuk kanë pasur të drejtë. Ne kemi bërë një raport për shqyrtimin dhe faljen e obligimeve në taksa dhe qira. Bizneset që nuk punojnë dhe janë të ngarkuara me takse komunale janë gjithsej 480 biznese, pra bizneset që punojnë dhe që janë të liruar prej taksës komunale me vendim të kuvendit të komunës së Rahovecit janë 849 biznese, po ashtu kemi edhe bizneset të cilët realisht kanë mbetur në obligime ndaj taksës komunale mirëpo që nuk punojnë për një arsye apo tjetër janë të mbyllur, që gjithsej janë 661 biznese. Besoj që për këtë pikë në muajin qershor në Kuvend do të dalim me një propozim dhe të merret vendimi nga ana juaj për faljen apo mundësinë e shqyrtimit të faljes së këtyre obligimeve të mbetura. Te nderuar kuvendarë, besoj që pas raportit që na vjen nga ana e komisionit për vlerësimin e dëmeve të krijuara gjatë pandemisë, do të dalim të diskutojmë rreth kësaj mundësie. Faleminderit

Fehmi Hoxha – Krejt në rregull është kjo, edhe unë po besoj që do të kryhet kjo brenda një muaji mirëpo edhe njëherë po e potencoj që të jem i qartë, e thash edhe më herët, mundësitë tona sa janë masandej bashke do ta diskutojmë këtu. Ju duhet të formoni një komision edhe pastaj e këqyrim, sa ka lokale të cilët janë të regjistruar pasi ka edhe lokale që punojnë ilegalisht pra edhe në qytet edhe në komunë të Rahovecit. Pra ata që janë taksapagues edhe i nënshtrohen ligjeve të Republikës së Kosovës, pra një komision se sa

janë ato lokale që kanë pasur të ndaluar e aty janë kafiteritë, frizeret edhe disa tjerë që unë nuk e di, e që ju me siguri e dini, pra le të bëhet kjo tani. Faleminderit!

Kryetari – Përshëndetje për anëtarët e kuvendit të komunës, kryesuesin, nënkryetarin, drejtorët e drejtorive, përfaqësues të mediave dhe gjithë juve që jeni prezentë në sallë. Florida Bajraktari ka bërë një pyetje sa i takon çështjes së ndërtimit të serave të reja të cilat ju dedikohen përfituesve 5 ari dhe 3 ari. Pra janë të ndara në dy lote, që realisht janë duke u marrë dy kompani, që kanë për detyrë me ekzekutua kontratën. Raporti i pjesëmarrjes për përmbushjen e këtij projekti është 80 me 20, pra 80% investon komuna kurse 20% investon apo merr pjesë fermeri. Është një kontratë e madhe edhe besoj që numri i përfituesve mund të jete mbi 300 përfitues, interesimi për serra ka qenë jashtëzakonisht i madhe dhe do të jete kontratë kornizë që me pas mundësi pastaj edhe sipas ligjit edhe 30% me i përmbush edhe ankesat që kanë mundur me i bo fermerët që nuk kanë mbërri me përfitua edhe me i shtua edhe njëherë me atë 30% që sipas ligjit është shtesë. Pra tenderi është i shpallur me shume se dhjetë ditë apo dy javë edhe presim zhvillimin dhe përfundimin e procedurave në lidhjen e kontratave, besoj që do të filloj sa ma shpejt që është e mundur ekzekutimi i projektit. Ne sot e kemi një raport, e kam të gatshëm raportin e evidentimit dhe vlerësimit profesional të dëmeve reale financiare që i kanë fermerët tanë, që janë të dëmtuar nga reshjet intensive të shiut dhe breshëri. Ky raport sot do të i dërgohet Ministrisë së Bujqësisë, Pylltarisë dhe Zhvillimit Rural kuptohet edhe Kryeministrisë dhe natyrisht ne kemi kërkuar edhe kërkojmë kompensimin dhe dëmshpërblimin e fermerëve të dëmtuar nga reshjet e fundit që brenda 48 orëve kanë prekur Komunën tonë dhe dëmet janë mbi 2 milion e gjysmë euro në perimekulturë dhe në vreshta. Raporti i dëmeve nga pandemia, dëmeve në ekonomi, dëmeve në bujqësi, dëmeve në biznese të vogla të mesme dhe të mëdha, shpresoj që do të jetë gati brenda një periudhe optimale, një afati të arsyeshëm dhe do të sjellët në kuvendë si informacion se cilat ishin humbjet e qytetareve tanë, bizneseve posaçërisht ekonomive familjare, të gjitha kategoritë e veprimtarive ekonomike biznesore, do të ketë një raporte profesional sepse ne do të kemi të angazhuar ekip profesional që ndoshta është edhe jashtë komunës tonë, edhe raporti do të jetë i certifikuar dhe i licencuar, edhe besoj që kompetentët nga niveli qendror do ta kenë parasysh që në pakon për rimëkëmbje ekonomike të përfshihen patjetër edhe bizneset e komunës së Rahovecit pra gjithë ata që kanë humbur përfshirë edhe kategorinë e fermerëve dhe bujqëve. Po ashtu kemi bërë edhe një raport për vlerësimin e dëmeve në amvisëri dhe në ekonomi familjare nga reshjet e fundit dhe fatbardhësisht nuk është ndonjë vlerë e madhe afërsisht 27,000 euro edhe pse kemi menduar me shume por në bujqësi është shume më i madhe. Për sa i takon faljes së borxheve do ta kemi një propozim konkret të bazuar në standarde të cilat i vlerësojmë i diskutojmë dhe i vendosim bashkë sepse ekziston një perceptim se nëse ne shkojmë me falje të borxheve ndaj kompanive që për një arsye ose arsye tjetër për neglizhencë nuk kanë dashur ose nuk kanë pasur mundësi të i përgjigjen obligimeve që i kanë në raport me komunën e Rahovecit e që është në kundërshtim me ato kompani të cilave ju kam përgjigjur edhe janë kredibile dhe funksionale rentabile në ekonomi. Pra nuk duhet të japim mesazhe se veç falim borxhe, gjithmonë flasim për borxhe të cilat nuk mund të inkasohen kurrë pra për ato po mirëpo duhet të caktojmë edhe periudhën pra duhet të bëjmë bashkërisht një standard, nëse është nevoja duhet me krijua edhe një komision të kuvendit të komunës që më qenë më të saktë dhe preciz edhe në mënyrë që kur të merret vendimi që ta arsyetojmë seriozisht mirë edhe mesazhi të jetë i mirë sepse neve na thonë bizneset sepse ka disa biznese që na thonë se ne vazhdimisht paguajmë se ashtu jemi mësuar dhe e kemi shprehur ndërsa disa të tjerë që ngurrojnë me i krye obligimet që ju takojnë sipas ligjit, atëherë e dinë se një ditë i falë kuvendi i komunës. Pra ne jemi për inkasimin e atyre borxheve që s'janë aktive fare ose nuk mundet të inkasoj komuna fare edhe auditori i jashtëm vazhdimisht e nxjerr si keq. Pra besoj që edhe Fehmin jemi dakord në këtë pikë pasi tani nuk i kam të gjitha por po besoj që kur të vjen radha ne qershor pra edhe unë jam pro asaj që me i fal këto borxhe, që

vazhdimisht na shkruhen si borxhe të painkasuara edhe ashtu nuk mundem me u inkasue sepse janë borxhe të vjetra mbi 20 vjetë që ose janë të ndërruara bizneset ose nuk ekzistojnë fare dhe tash duhet me bo diçka sepse vazhdimisht po na shkruhen si borxhe nga Auditori i Jashtëm dhe po na bien si barrë e rende që s'po korrigjohen nga ana e komunës së Rahovecit, pra është rasti me i falë borxhet dhe jemi pro kësaj. Tek pyetja e Fehmi Cenës, rreth mos pagesës së punëtorëve të cilët kanë punuar me Caritas Kosoven. Kontrata e punëtorëve të angazhuar me Caritas Kosova ka përfunduar në muajin shkurt dhe Drejtoria e Shëndetësisë bashkë me Drejtorin e QKMF-së i ka ftuar që deri në lidhjen e kontratës së re, të nënshkruajnë një dokument i cili nënkupton punë vullnetare deri në kontratën e re. Procedurat e kontratës së re janë kryer dhe është lidhur dhe për atë muaj kanë qenë në dijeni se kanë me punua pa pagesë ndërsa në muajin e dytë ishte nga pandemia dhe menjëherë Drejtori i Shëndetësisë në emër të QKMF-së pra në emër të këtyre shërbimeve ka dërguar shkresë në Ministrinë Shëndetësisë, në Ministrinë e Financave që të kompensohen shërbimet që ata kryejnë dhe ende nuk ka ndodhur pra nuk kemi ende përgjigje pozitive dhe janë diku 300 persona në shkallë republike që punojnë me shërbime me Caritas dhe që nuk e kanë marr kompensimin e që e kanë marr punëtorët e tjerë pra fjala është për punëtorët e rregullt shëndetësorë si mjek, stomatolog, infermierë pra këta të rregullt i kanë marrë mirëpo nuk i kanë marr këta që janë me shërbime me Caritasin. E vërteta është se diku ka ndërhyje vet Caritasi që i ka cilësuar punëtorë të vet direkt dhe kanë mundur me marr ndonjë pagesë mirëpo në rastin konkret ata kur është shkëput kontrata në neve pra pasi ka përfundua kontrata atëherë me gjasë i ka mbete vetëm komunës konkretisht Drejtorisë së Shëndetësisë me bo kërkesën sikur e kanë bërë edhe komunat tjera dhe shpresojmë që të kompensohen sepse e meritojnë po aq sa të tjerët që janë të rregullt sepse nuk e kanë lëshua frontin për asnjë minutë. Pra unë jam dakord me Fehmi Cenën që ata duhet me u kompensua. Komuna nuk mund t'i kompensoj përveçse prej këtij muaji ata do të marrin pagesë pasi që kemi kontratë pra është lidhur kontrata me kompaninë që merret me rivitalizimin pra është i njëjti kodë por është kompania që ka kontratë tani me komunën e Rahovecit edhe besoj që ata kanë me i bo pagesat edhe kontratat të gjithë ata që kanë punuar të ju vazhdohet kontrata por për këtë një muaj që janë pa pagesë, shpresoj në një zgjidhje që do të na jep qeveria e Kosovës sepse edhe këta pothuajse janë sjellë apo kanë punuar si punëtorë të rregullt. Pra ne nuk kemi mundësi me paguar sepse nuk na lejon ligji, nuk na lejon procedura dhe nuk kemi mundësi si kuvend me nda shumë për me i pagua për shkak se që një muaj që janë pa pagesë me ju dhanë ne si kuvend i komunës sepse edhe nuk kemi mjete por nëse i kompensojmë qeveria në pakon emergjente atëherë shpresojmë do të bëhet mirë. Por unë besoj që ata janë dakord sepse edhe viteve tjera kanë punuar edhe ka 2 apo 3 muaj për shkak se janë ndërpre kontratat dhe deri sa janë lidhë kontratat e reja, edhe këtë vite duhet të kenë pak durim pasi ne i respektojmë shumë për gjithë punën që kanë bërë dhe vazhdojnë me bo por tani përcillet mesazhi që prej kësaj kohe do të fillon më mirë për shërbimet që i kanë, por atë ne nuk mundemi të kompensojmë por presim që do të na ndihmon qeveria nga pako emergjente. Faleminderit

Sali Sallteku – Për bujqit kjo është bërë një problem i madhë pasi kjo është një e keqe, që me punua një vit pasi është deshtë me u krye, tani pasi ndihma e duhur është deshtë të kryhet tani, pasi një gabim i tillë është përcjelle vazhdimisht dhe nuk është vetëm i juaji. Dëmet në bujqësi janë shumë të mëdha dhe përveç asaj i kanë bllokuar pothuajse të gjitha pasi e kanë ndaluar me shitë fidanë, me krijua tregun apo edhe me punua.

Kryetari – Për shkak të gjendjes së pandemisë, së pari është miratuar me vonesë Buxheti i Republikës së Kosovës dhe këtë e dini, e dyta pandemia ka shkaktuar një situatë të re pasi Komisioni Rregullativ i Prokurimit Publik nuk ka lejuar hapje të procedurave pra ka pasur afat që nuk ke pasur të drejtë me hap procedura. Tash ne jemi në fund të muajit maj dhe besoj që në momentin kur ne e kemi pasur rastin ku na

është dhënë e drejta për me operua me buxhetin d.m.th. veç është përgatitur koncepti është bërë shpallja dhe tash unë e di serrat më se miri është me i pasur ne pranverë por nuk kemi pasur mundësi me operua dimrit pasi kontrata e vjetër ka përfunduar edhe jam dakord plotësisht për atë që po e thua ti pasi ju kish deshtë më herët por i nevojiten edhe tash verës nëse bëhet serra dikush nëse është punëtorë edhe mundet me shfrytëzua. Ne jemi të interesuar me ndodhë punë sa më shume punë sivjet edhe me serra. Ju e dini se fermerët, ne po kërkojmë kompensim edhe unë jam i bindur se ka me ndodh kompensimi sepse vlera mbi 1 miliard euro pa i përfshije pemët sepse raporti veçse po kompletohet dhe mund me shkua rreth 3 milion dhe unë po kërkoj pasi edhe zyrtarisht edhe publikisht kam kërkuar pasi e kam pasur edhe Ministrin, këtë e din edhe zyra e Kryeministrit edhe krejt opinionin publik se fermerët meritojnë një dëmshpërblim pra fermerët e Rahovecit pasi unë nuk mundem me than për fermerët e Mamushës, të Suharekës apo të Prizrenit por më shumë se fermerët e Rahovecit në këtë periudhë, nuk është dëmtuar askush. Në qoftëse ne e kemi një fond të fatkeqësive natyrore që është i Ministrisë së Bujqësisë prej 3 milion eurove madje ne kemi kërkuar me rrit atë fond edhe me ju nda fermerëve, sepse e keni parë se fermerët janë goditë edhe për shkak se ende nuk i kanë përfshire në pako emergjente, por, shpresojmë që me i përfshi në pakon e rimëkëmbjes ekonomike, edhe mos me i kompensua tash dëmet edhe me ju ndalua tash tregu, pasi ne po e dimë tash se në çfarë gjendje jemi. Unë jam duke luftuar edhe ne emër tuajin që me ndodhë kompensimi dhe me u futë në pakon emergjente po ashtu edhe ne pakon e rimëkëmbjes ekonomike edhe ato serra me i ndërtua sa ma shpejt që është e mundur ne momentin kur kemi leje me ekzekutua kontratën.

Fehmi Cena – Për çështjen që e propozova, kryetari dha disa sqarime që në rregull është kjo, mirëpo megjithatë unë mendoj që për shkak se ka qenë një periudhë specifike në kohën e pandemisë pasi ata njerëz kanë punuar dhe u janë nënshtruar rrezikut sikurse punëtorët e rregullt, për atë arsye edhe qeveria e ka dhënë pakon emergjente që të jetë një lloj shpërblimi për shkak të rrezikut edhe ata kanë punuar në atë kohë edhe mos me marrë pra mos me u pagua as nga ky projekt as nga niveli qendror, kjo nuk është në rregull dhe unë mendoj që megjithatë që ju duhet të gjeni forma, metoda që këta punëtorë të kompensohen për këtë kohë. Është shumë mirë që ju keni kërkuar nga niveli qendror dhe nuk e di pse nuk e keni bërë me herët që ndoshta ata kanë mundur me krye në pakon e përgjithshme bashke me punëtorët e rregullt, bile ato 250 euro me i marr. Po ashtu, është e vërtetë se ata kanë nënshkruar ka një letër që do të punojnë vullnetarisht, mirëpo ajo është përgjegjësia e tyre morale, mirëpo nga aty unë mendoj se dalin detyrime, nga institucioni, nga komuna që megjithatë ka mundësi me u kompensua. Tash nëse ka nevojë, le të sakrifkohet sivjet edhe një projekt i vogël në infrastrukture edhe ashtu e dimë se çfarë viti është dhe nëse jo, atëherë le të bëhet nëpërmjet formave tjera. Në mbledhjen e kaluar ky kuvend, me sa e di unë kemi ndarë mjete të buxhetit pikërisht për shëndetësi për paga dhe mëditje, ndoshta ato do të shkojnë për diçka tjetër, ndoshta ne prapë do të mundemi që në të ardhmen, që brenda vitit me nda një pjesë prej një pozicioni, aq do të kushton përafërsisht një përlllogaritje që ne kemi bërë diku rreth 30,000 euro do të kushton, dhe kjo punë ishte kryer ashtu siç duhet. Komuna do të ju mbetet borxh atyre njerëzve nëse nuk e kryen këtë kompensim.

Kryetari – Është e vërtetë që ata e meritojnë shpërblimin po ashtu është e vërtetë që ne kemi situata edhe në arsim, kanë mbetur me paga brenda dhe nuk ka mundur asnjëherë me u futë në listë të pagave dhe kur janë futë në listë të pagave pastaj ka 2 apo 3 muaj ju kanë lëshuar. Unë e di që ata e meritojnë dhe plotësisht jam dakord por nëse e hapim këtë derë atëherë ekziston rreziku që d.m.th. atëherë kuvendi i komunës me pague në shume pozicione me shume 30,000 euro, dhe ne jemi të vetëdijshëm se atyre 1 muaj ju ka shkua pasi edhe kanë pranua vullnetarisht vet me punua sepse edhe ashtu kontratë nuk kemi pasur edhe s'kemi pasur mundësi si t'i paguajmë dhe nëse qeveria e Kosovës ka me fut dikë prej ndonjë komune me shërbime

të veçanta prej Caritasit ose shërbime si këto, unë jam i bindur që pashmangshëm ka për obligim me shtie edhe 45 punëtorë të komunës së Rahovecit. Nëse ne do të mundemi me operatorin që ka kontratë me ne, më bo ndonjë zgjidhje gjentelmene, nuk po them zgjidhje ligjore por nëse ka ndonjë mundësi me bo ndryshe, nuk është se kemi hequr dorë nga përkushtimi për me ju ndihmua ose me i shpërblye ata që e meritojnë por nuk guxojmë me rrezikua kuvendin e komunës me nda mjete diku 30,000 euro, këtu e kemi edhe drejtorin e DKA-së edhe unë e di që shume raste që kanë mbetur me ka 2 apo 3 muaj që nuk i ka shtie ne liste të pagave dhe u deshtë me prit edhe asnjëherë si kam kompensua për muajt që i kanë kryer si mësimdhënës pra na dalin shumë probleme dhe besoj që mirëkuptohemi, po ashtu e di që kanë kryer një punë të mirë edhe mjekët edhe infermieret e po ashtu edhe ata me shërbime të Caritasit padyshim por edhe inspektorët, policia edhe krejt bashke.

Fehmi Hoxha – Unë kam një shqetësim e për të vazhduar menjëherë me pyetjen për kryetarin. Para një viti e gjysme keni ndërmarrë një iniciativë edhe keni ftuar të gjithë inxhinierët e komunës së Rahovecit të ndërtimit të të gjitha profileve, gjë që unë sinjerisht ju kam përgëzuar për atë iniciativë që e keni marrë, për me bo një zgjidhje të qëndrueshme për qytetin e Rahovecit për trajtimin e ujerave atmosferike dhe ujërave të zeza. Tani këto ditë keni filluar në renovimin e asfaltit në qytet pa e bërë zgjidhjen e qëndrueshme siç edhe keni premtuar që do ta bëni për trajtimin e ujerave të zeza dhe ujerave atmosferike. Tani po shpenzojmë kinse në renovimin me një kosto të madhe e që nuk është e vogël dhe përsëri do të vjen koha që vitin e ardhshëm po besoj që prishet asfalti dhe të trajtohet. A keni bërë ndonjë plan se si po e bëni këtë pasi sinjerisht ju kam përgëzuar si ide atëherë mirëpo tani po e shoh se nuk po bëhet ashtu siç keni premtuar dhe po bëhet armimi në qytet të Rahovecit. Faleminderit shumë!

Kryetari – Ne kemi një kontratë për riparimin e gropave, riparimin e zonave të dëmtuara në qytet. Është një kontratë që fatbardhësisht e kemi prej kohës së qeverisjes së Idriz Vehapit edhe ne nuk kemi një buxhet të mjaftueshëm aty. Është e vërtetë se i kam takuar afërsisht 20 inxhinierë dhe arkitekt edhe kemi pasur një takim me ata. Të gjithë këta nuk është se kanë sjellë ndonjë zgjidhje përveç dy apo tre vetëve që kanë sjellë edhe ka pasur mospërputhje të ideve koncepteve apo propozimeve që i kanë marr edhe kanë ardh te një konkluzë se rruga prej LAB-oil e teposhtë duhet të bëhet një kanal me vlerë prej 450,000 euro e deri te stacioni i autobusëve edhe me u lidhë me lumin Dullo dhe pastaj me krijuar disa veprime tjera për me i qu ujërat e shiut dhe po ashtu edhe ujërat e zeza që pastaj me i dërguar te lumi Rimnik në Fortesë e më pastaj në Drinin e Bardhë. Tani ne jemi dakorduar që të gërryhet asfalti të rregullohen mirëfilli i pusetave dhe të shikohet si është gjendja e tyre nën asfalt tek bazamenti i tyre sepse vazhdimisht po i fundos edhe me i riparuar të gjitha ato dhe po ashtu të bëjmë një bajpas nga Lab-oil për tek lumi Dullo pra një kanal shtesë me gypa dhe një pjesë të ujit ta shkarkojmë atje pasi edhe nuk jemi jashtë ideve që kanë dhënë inxhinieret pasi kjo ishte edhe ide e kahershme nga inxhinieret po ashtu edhe nga drejtori i Shërbimeve Publike e ka përmend, po ashtu edhe Rasimi disa herë e ka ngritë si çështje për këto gropa të cilat krijohen pasi vazhdimisht na kanë krijuar probleme dhe tash kemi vendos me i rregullua mirë pusetat, me i këqyrë që mos është shpërthye ndonjë gyp në tokë, me i pastrua ata gypa pasi e dimë se është një gyp i madhe aty në rrugën kryesore që me siguri është vendos qysh para luftës me gjasë, dhe tash kur i kanë lidhë ujërat e zeza me ujërat e shiut edhe janë përzije qytetarët që kanë tentuar me bo zgjidhje aty për aty dhe tash janë mbushë me gurë edhe me mbeturina me drunjtë e shumëçka dhe tash duhet me angazhua kompaninë rajonale të ujësjellësit, Gjakova,, edhe sigurisht bashkë me ne që ta pastrojmë edhe nëse ka ndonjë defekt me riparua edhe me i shtrua 7cm asfalt edhe me i nivelizuar krejt. Pra, bajpasi behët, asfalti prej udhëkryqit atje e deri te rruga kryesore kam vendosur me trajtue sivjet dhe mundësisht po përpiqem me krye para se me ardhë mërgimtarët, jo pse duhet me u lidh me mërgimtarët por për shkak se janë krijuar disa gropa edhe

vazhdimisht duke vendos beton, përsëri po dëmtohen dhe ne po duam me trajtua këtë problem dhe po mendojmë se është një zgjidhje për një periudhë kohore mbi 10 vjet. Por zgjidhja me e mirë është me livrua rrugën kryesore krejt edhe me trajtua nga fillimi gjithçka mirëpo tani për tani po bëjmë ta pamundurën që me evitua problemet që po na shfaqen si asfaltim me 7cm trashësi, shenjëzim horizontal dhe vertikal, bajpas, rregullim dhe standardizim të pusetave dhe unë besoj që ka me marr një pamje pak më të mirë edhe qyteti edhe do të jemi më të kënaqur por a është kjo zgjidhje e përhershme, nuk jam shumë i sigurt por meqenëse tash e kemi në plan edhe Sheshin Qendror bashkë me UN-Habitatin po ashtu e kemi në plan me i krijuar edhe disa parkingje edhe me i evituar disa ujëra që krijohen te Palestra edhe sigurisht që fillojnë me u zvogëluar ujërat në disa rrugë po ashtu edhe ujërat që krijohen në rrugën transite me 3 korsi që do të bëhet e njohur si rruga e UÇK-së pra fillojnë me u zvogëluar ujërat në qytet dhe po ashtu fillon me u stabilizua qyteti me një asfalt të mirë dhe puseta të standardizuara me pastrim të gypave dhe një bajpas, pra ky është thelbi kurse për detaje definitivisht mundeni me ardhë të drejtori i shërbimeve publike po ashtu me u konsultua edhe me inxhinieret se çfarë po mendojnë këta. Ne nuk po duam me bo menjëherë gërryerjen por pjesë pjesë pra sot ka filluar gërryerja nga semaforët e teposhtë edhe njëkohësisht ka filluar rregullimi i pusetave nga semaforët e deri në qendër. Unë mendoj se ka me u bë një zgjidhje e mirë se paku në planin afatmesëm e qëndrueshme.

Munib Durguti – Faleminderit kryesues, unë nuk e kisha në plan të ndërlihem por informata e kryetarit dha një shqetësim për këtë bajpas që do të ketë kyçje të ujërave atmosferike te lumi Dullo te parku i qytetit. Unë shume herë e kam ngritë shqetësimin që shtrati i lumit nuk ka mirëmbajtje për shume vite, vitin e kaluar ka pasur një gërryerje një pastrim sipërfaqësor edhe ajo na ka shpëtuar prej përmbajtjeve mirëpo në kushte normale dhe kur shtrati i lumit është i pastër kur kemi reshje atmosferike përsëri uji del prej shtratit të lumit. Pra rruga Xhelal Hajda krijohet një bajpas në ato ujëra dhe shkojnë në lumin Dullo, pa u trajtuar rishtas ky lum ky është mesazh shumë i keq dhe për banorët e lagjes kjo nënkupton përmbajtje dhe kurrjë tjetër, pasi shtrati i lumit është shumë i vogël dhe nuk ka me përballua në asnjë rrethanë sjelljen e ujërave deri aty. Faleminderit.

Kryetari – Unë e kuptoj shqetësimin Munib, por problemi është se tash kemi edhe kontratë për intervenime emergjente. Të shohim se dikush që është larg vëmendjes edhe trajtimi i shtratit të lumit Dullo ndoshta edhe do të bëhet edhe ndonjë përshkallëzim pra nuk bëhet fjalë për zgjidhje të një problemi edhe zhvendosje të atij problemi në një pjesë tjetër. Ne po flasim për një zgjidhje e cila natyrshëm që e rritë vëllimin e ujit në pjesën ku vjen edhe ajo ndodh zakonisht gjatë reshjeve edhe sigurisht që vërshimet ndodhin gjatë reshjeve sepse kur nuk ka reshje është normale. Ne kemi në plan trajtimin e lumit Dullo madje edhe zgjatjen pasi e dimë se çka ndikon që me u frye dhe mu bo pengesë, që përveç shtratit kur është bërë kalkulimi atëherë i projektuesit, vëllimin e ujit e ka matë te ajo ura aty edhe nëse thelbi i shpjegimit i projektuesve atëherë dhe nëse ka pasur ndonjëherë vërshime potenciale, rreziku është tash shume me i vogël me pas vërshime sepse ne e masim me këtë urë dhe nëse duam me ndërrua urën krejt dhe me rrit perimetrin e urës atëherë kjo zgjidhje e bajpasit por nuk është që do të bëhet pa e përfill edhe atë shqetësimin që unë e di edhe me herët, që ndoshta edhe duhet me u thellua shtrati apo ndoshta duhet me u bo edhe kaskada apo të zgjerohet gryka pra ne kemi njëkohësisht edhe dy kompani emergjente pasi është e ndarë në lote, apo që është nevoja me ngritë ndonjë mur pra kanë me qenë detaje që kanë me qenë pjesë ndoshta jo në kontratën për riparim por ne do ta ndërlihim me kontrata tjera sepse nuk jemi të interesuar me sjellë ujin dhe me pas problem tjera në mallra amvisëri ekonomi. Pra jemi të interesuar me i bo një zgjidhje problemit edhe me bajpas edhe problemi që potencialisht shkaktohet dhe kur të vjen kompania dhe

fillojmë me trajtua atë pjesë unë kam me qenë dëshmitar edhe me banoret e lagjes që çka duhet me bo aty që mos me u grumbullua edhe mos me ju krijua problem uji.

Kryesuesi – Faleminderit Kryetar, të nderuar kuvendarë, kalojmë në pikën e tretë të rendit të ditës:

3. Shqyrtimi dhe miratimi i propozim vendimit për bartjen e tejkallimit të të hyrave vetanake nga viti 2019.

Afrim Limani – I nderuar kryesues, kryetar, nënkryetar, kuvendarë dhe gjithë ju të pranishmit në sallë. Në fakt kjo pikë e rendit të ditës, siç e dini të gjithë ka kaluar në muajin janar mirëpo arsyeja se pse ka ardhë edhe njëherë në Kuvend është sepse departamenti i buxhetit në kuadër të Ministrisë së Financave, faktikisht nuk na kanë aprovuar këtë vendim me arsyetimin sepse titulli i këtij vendimi ka qenë vendim mbi tejkallimin e të hyrave. Ndërsa tash na duhet sipas rekomandimit të tyre duhet të shkruhet vendim mbi bartjen e tejkallimit të hyrave dhe realisht është shuma e njëjtë e tejkallimit të të hyrave me vlerë 139,750 euro edhe këtë shume është i njëjti dokument të cilën në janar që e kemi shpërndarë në projekte të caktuara. Pra, është projekti në kuadër të drejtorisë për Arsim për ngrohje qendrore nëpër shkollat e komunës së Rahovecit 36,000 euro pastaj Ndërtimi i sistemit të ujësjellësit në komunën e Rahovecit 20,000 euro, Ndërtimi qendrës kryesore të mjekësisë familjare 61,750,37 euro edhe Investimi në Zonën Ekonomike në Opterushë 22,000 euro. Pra kjo është arsyeja se pse ka ardhë edhe njëherë në Kuvendë. Faleminderit!

Rasim Fazliu – Faleminderit kryesues, edhe drejtori e tha që njëherë kemi marr vendim për këtë çështje mirëpo për shkak se është i punuar keq edhe ata e kanë kthyer dhe nuk e di që vendimin që e kemi marr a duhet edhe njëherë me anulua atë vendim për me marr vendim të ri. Por vetëm desha me u ndërlidh me atë që është mirë me u krijuar praktikë e mirë, që drejtorët para se me i sjellë këtu materialet pra pikat e rendit të ditës, duhet me i shqyrtua mirë edhe mos me ardhë momenti që me na kthye qoftë MAPL-ja apo Ministria në këtë rast e Financave, se në të njëjtin rast përveç kësaj pike e kemi edhe pikën tjetër për odën në Radoste që do të ndërtohet atje e kështu që me qenë me te vëmendshëm do të ishte më mirë dhe mos me u përsërit këto lëshime. Faleminderit!

Kryetari – Këtu ka gjuhëtar dhe njerëz me përvojë që mundet dikush me ma përkthye vendim për bartjen e tejkallimit të të hyrave vetanake nga viti 2019, une mendoj se ata kanë gabua e jo na, ndoshta mundet me qenë vendim për bartjen e të hyrave vetanake të tejkalluara por kjo si fjali, unë nuk jam gjuhëtar por me sa marr vesh unë asnjë kuptim nuk e ka. Ata të departamentit të buxhetit për komunat në momentin kur e kalojmë ne, unë do të ju shkruaj një letër për këtë fjali vendim për bartje të tejkallimit nuk e kuptoj. Bartja e të hyrave vetanake të tejkalluara ose që kanë dalë jashtë planit mundet ama bartje e tejkallimit nuk e kisha dëgjuar ndonjëherë. Pra, nëse ata kanë pasur vërejtje në titull që se kemi përmend të hyra vetanake të tejkalluara pajtohem por nëse ky titull duhet me u kon vendim, unë do t'i shkruaj një letër edhe me ditë se çfarë vendimi është, këtu ka gjuhëtarë edhe juristë, unë mendoj se s'ka kuptim kjo fjali.

Afrim Limani – Unë deshta vetëm një arsyetim, unë personalisht në cilësinë e drejtorit për Buxhet dhe Financa kam pasur përvojë edhe më herët të natyrës së tillë, edhe para këtij mandati nëse tejkallohen të hyrat e planifikuara do të thotë kemi fjalën për tejkallim të të hyrave. Tash, te çështja e bartjes së të hyrave do të thotë se kemi pasur debate të shumta me departamentin e buxhetit të Ministrisë së Financave mirëpo tash prapë sipas sugjerimeve të tyre prapë duhet të shkruhet bartja. Ne kemi tejkallim mirëpo njëherit duhet të behet bartja e këtyre të hyrave. Te them të drejtën sinqerisht nuk e kam ditur edhe tash unë e kam praktikua përvojën të viteve të kaluar edhe e kemi shkruar tejkallim mirëpo s'kemi çka bëjmë edhe duhet me i zbatua rekomandimet e tyre, kjo është arsyetimi. Faleminderit

Fehmi Cena – Kur jemi te kjo pike e rendit të ditës, te vendimi për bartje të hyrave vetanake nga viti 2019 ne vitin 2020, dua të ndërlihem me pikën 3.3 faqja e parë te shëndetësia është ndarë, propozimi është një shumë 61,750 euro për ndërtimin e objektit të ri të QKMF-së, dhe mua po më intereson me ditë me këtë buxhete, a do të kryhen punimet në atë objekt apo do të ketë nevojë edhe më tepër që të punohet përafërsisht kur ai objekt do të hapet apo të jetësohet, a do të ketë me shumë buxhet për renovime apo me këto do të kryhet. Faleminderit!

Kryetari – Në korrik po shpresojmë që të hapet objekti i ri i QKMF-së, me gjasë përmbyllet kontrata me këtë operator edhe objekti lëshohet ne funksion sipas asaj qysh jemi dakorduar në korrik.

Munib Durguti – Pyetja për drejtorin, së a është vendimi i njëjtë që i ndryshon vetëm titulli apo kemi edhe ndryshime tjera pra vetëm një sqarim.

Dervish Çadraku – Përshëndetje për të gjithë, edhe unë pajtohem me parafolësit se çfarë u fol deri me tani për këtë rend të ditës por kam një vërejtje për të cilën ne kemi marr vendim qysh ne janar për këtë pikë, por të them të vërtetën ja 3 apo 4 herë kam qenë në Qendër Kryesore të Mjekësisë Familjare për me bo analiza edhe deri sa ka qenë pa u mbyll nga pandemia, nuk ka pasur reagenca dhe nuk ka pasur material për laboratorin e analizave. Këtu në pikën 3.3 keni ndaje 61,750 euro për me rregullua emergjencën që është shume e rëndësishme, po ashtu edhe këto mjete tjera që i keni shpërndarë po aq të rëndësishme janë për me i krye këto punë por megjithatë, meqenëse veç na ka ardh material, a kemi mundësi me ndryshuar destinacionin se qytetaret shkojnë atje edhe s'kanë mundësi një kategori e tyre me i bo analizat edhe me ble material pra nja 4 apo 5 here sa kam shkuar nuk ka pas material edhe disa herë e kam tërheq vëmendjen këtu që të kemi kujdes sepse nuk kemi material edhe me llogarit që me i ndarë disa mjete nga këtu. Faleminderit!

Kryesuesi – Faleminderit z. Çadraku, atëherë të nderuar kolegë, meqë nuk ka tjerë të lajmëruar, e qesim në votim edhe pikën e tretë të rendit të ditës. Konstatoj se unanimisht aprovohet pika e tretë e rendit të ditës. Kalojmë në pikën e katërt të rendit të ditës:

4. Shqyrtimi dhe miratimi i propozim vendimit për dhënien e pronës komunale në shfrytëzim afatgjatë.

Afrim Oruqi – Faleminderit kryesues, i nderuar kryetar, nënkryetar, anëtarë të kuvendit komunal dhe gjithë ju të pranishmit. Para jush e keni një vendim për dhënien në shfrytëzim afatgjatë të pronës publike, të njëjtin vendim e kemi pasur edhe me përpara në muajin Mars edhe pse e kemi marr ligjshmërinë prej MAPL-së për këtë vendim. Sipas kërkesës se këshillit të fshatit Malësi e Vogël ne kemi vendosur që bashke me juve që të ndajmë një sipërfaqe për ndërtimin e një objekti i cili do të shërbej interesave të përgjithshme të këtij komuniteti mirëpo për arsye teknike në bashkëpunim me Urbanizmin, Shërbimet Publike dhe Drejtorinë Bujqësisë e kemi vlerësuar që sipërfaqen e njëjtë prej 7 ari e disa metra katror të i marrim prej 3 parcelave e jo prej një parcele për shkak se në atë zone atje ku veçse ka filluar ndërtimi i një objekti për interes të përgjithshëm që mos me rrezikua që në të ardhmen me zgjerua rrugën Malësi e Vogël-Ratkoc që mos me rrezikua e me vazhdua edhe me zgjerua një kanal të ujërave po ashtu edhe rrugët dytësorë që kalojnë përkaj këtyre parcelave, kemi vendosur që të marrim këtë sipërfaqe të njëjtë prej 7 ari e 69m2 ne 3 parcela që te gjitha janë zonë kadastrale në Malësi të Vogël te cilat janë prona shtetërore të Kosovës me numër 319/1,1646/0 dhe 303/0 ku pjesës së parë i merren 136m2, të dytës 56m2 dhe parcelës se tretë i merren 577m2, që të gjitha këto se bashku bëjnë 7 ari 69m2. Qëllimi i këtij vendimi për dhënien në shfrytëzim afatgjatë për 99 vite është që të jepet në shfrytëzim këshillit të fshatit Malësi e Vogël për interesa të përgjithshme për ndërtimin e një objekti i cili do të shërbej në zhvillimin e aktiviteteve kulturore

dhe të tjera. Pronat e cekura me lartë në shfrytëzim jepen për 99 vite pa kompensim. Komuna e Rahovecit do të kujdeset që të krijojë një kontratë ku do t'i pamundësohet e drejta tjetërsimit të pronarit prej një pronari në pronarin tjetër. Me hyrjen në fuqi të këtij vendimi që e keni para jush shfuqizohet vendimi me numër 01/57/20 të datës 30.03.2020. Ftoj kuvendarët që pas shqyrtimit të aprovojnë vendimin për dhënien në shfrytëzim afatgjatë.

Sali Sallteku – Faleminderit kryesues, unë po flas rreth asaj që vërtet në aspektin material është një shumë e madhe pasi e dimë se nuk është e lehtë me i grumbullua 50,000 euro, mirëpo në këtë rast duhet që edhe komuna të merr pjesë në bashkëfinancim se paku me 20% kurse shumat prej 80% i takon banorëve të fshatit. Sigurisht me këtë shumë do të ju jepet përkrahje qytetareve pasi janë duke bërë një punë të madhe dhe të mirë aty dhe sigurisht që Kryetari duhet ta ketë parasysh këtë por është mirë bile 20%. Pra nga shumat prej 50,000 eurove që është gjithsej, të paktën 10,000 të merr pjesë komuna. Tash nuk e di sa do të këtë mundësi komuna të participon rreth kësaj mirëpo megjithatë është mirë me marr parasysh këtë sepse ka qenë një vullnet i madh pasi nëse bazohemi nga ajo që që zakonisht e ka praktikuar komuna apo qeveria për participim 80% me 20% atëherë në këtë rast është e kundërta pra 80% financon banorët e fshatit Malësi e Vogël kurse 20% të participon komuna. Faleminderit!

Fehmi Hoxha – Unë po e shoh një gabim këtu në hartimin e këtij vendimi për dhënien e pronës afatgjate. Miratohet vendimi i kryetarit të Komunës por duhet të jetë miratohet propozim vendimi i kryetarit të komunës me numër 02/371/20 të datës 10.03.2020, pra, duhet të shkruhet propozim vendim dhe merret vendimi paraprak për dhënien e pronës se paluajtshme të komunës në shfrytëzim personave fizik dhe juridik në shfrytëzim afatgjatë nga 15 deri 99 vite, duhet të shkruhet dhe të merret vendimi i pronës komunale sipas propozim vendimit të kryetarit në shfrytëzim afatgjatë deri 99 vite. Pra, e kemi afatshkurtër deri 15 vite, afatmesëm deri 35 ose 40 dhe afatgjatë deri 99 vite. Si vendim do të thotë tekstualisht të përmissohet afatgjatë 99 vjet. Faleminderit!

Isak Hoti – Përshëndetje kryesues dhe juve delegatë të nderuar. Ky është propozim i kryetarit të komunës dhe kur ka ardhur e kemi pasur edhe propozimin prezent edhe ne nuk mundemi me thanë ndryshe në vendim pos që miratohet propozimi i kryetarit. Unë në dokumentin tim e kam propozimin e kryetarit të komunës kurse te ju me siguri është ndonjë lëshim teknik, edhe te neni 40 i ligjit për dhënien në shfrytëzim dhe këmbim të pronës së paluajtshme komunale i specifikon këto çështje të cilat ne nuk guxojmë me dal jashtë kësaj p.sh. kur thotë ne afatgjatë sepse janë dy lloje, nga 1-15 e kemi afatshkurtër dhe nga 15 – 99 është afatgjatë. Edhe ne këtë rast ne jemi të obliguar me qenë konformë për shkak se te propozimet shpesh po na ndodhë që po hasim në të njëjtin problem edhe Rasim Fazliu shpesh e ka ngritë të njëjtën çështje, pasi ato çka janë brenda me ligje nuk guxojnë me dal jashtë asaj. Po ashtu edhe te vendimi paraprak jemi të obliguar me than vendim paraprak deri ne konfirmimin e ligjshmërisë të aktit nga Ministria e Administrimit të Pushtetit Lokal, pra këto janë çështje te rregulluara me ligj dhe besoj që jemi të qartë. Faleminderit shumë!

Fatmir Iska – Faleminderit kryesues, të nderuar kuvendarë, përshëndetje për të gjithë. Unë veç desha të përgjigjem meqenëse kryetari nuk është për momentin, rreth ndërtimit të odës në fshatin Malësi e Vogël. Unë po e citoj kërkesën e kryetarit të fshatit: „kërkojmë që të na lejohet dhe të na mundësohet të ndërtojmë me paratë e tona në parcelën e komunës,.. Kështu që nuk keni kërkuar mjete prej komunës edhe ne e kemi respektuar ne maksimum kërkesën tuaj. Faleminderit!

Sali Sallteku – Unë e kam lexuar kërkesën që e ka shkruar kryetari i fshatit, ndoshta edhe nuk e ka formuluar ne mënyrën e duhur. Është mirë që mos me u marr me atë që ka shkruar ai por duhet ta kuptoni

me realisht këtë kërkesë edhe të ja përcjellni këtë kryetarit edhe të merr përgjegjësi rreth kësaj që ta paguan të paktën 10% të shumës. Faleminderit shumë!

Kryesuesi - Faleminderit shumë z. Sallteku, atëherë të nderuar kuvendarë meqë nuk kemi tjerë të lajmëruar, e qesim në votim pikën e katërt të rendit të ditës. Konstatoj se unanimisht kalon pika e katërt e rendit të ditës. Kalojmë në pikën e pestë të rendit të ditës:

5. Shqyrtimi dhe miratimi i propozim vendimit të Kryetarit të Komunës për dhënien e pronës së paluajtshme – lokaleve afariste të Komunës në shfrytëzim personave juridik.

Artan Asllani – Faleminderit kryesues, përshëndetje për te gjithë. Para jush e kemi propozim vendimin për dhënien në shfrytëzim të lokaleve afariste komunale që kryesisht janë 20 lokale, që deri me tani kanë qenë në shfrytëzim nga personat juridik dhe fizik ndërsa mund të ju them se para vetes kemi të specifikuar numrin e parcelave dhe hapësirën e këtyre lokaleve, ku 18 prej tyre gjenden në zonën kadastrale në Rahovec në rrugën Xhelal Hajda dhe Avdullah Bugari kurse 2 prej tyre gjenden në fshatin Xerxe konkretisht te depot e Matrex-it. Qëllimi i dhënies në shfrytëzim të pronave të paluajtshme të komunës, lokalet afariste të cekura në pikën 1,2,3,4 të këtij propozimi, është ruajtja dhe rritja e vlerës së aseteve komunale dhe njëkohësisht edhe ju jepet mundësia të gjitha bizneseve komunale të ushtrojnë veprimtarinë e tyre në këtë hapësirë të këtyre lokaleve. Komuna e Rahovecit e ruan të drejtën kurdoherë sipas nevojës dhe realizimit të interesave publike të komunës të ndryshoj kontratën e përfituesit për dhënien në shfrytëzim. Ndërsa për procedurën për dhënien në shfrytëzim të pronës së paluajtshme për shfrytëzim afatshkurtër realizohet përmes ankandit publik. Pres nga kuvendaret që të votojnë këtë propozim vendim. Faleminderit!

Rasim Fazliu – Faleminderit kryesues, edhe në Komitetin për Politikë dhe Financa e kemi shqyrtuar këtë pikë të rendit të ditës për dhënien në shfrytëzim afatshkurtër të pronave të paluajtshme komunale gjegjësisht lokaleve afariste që gjenden në territorin e komunës së Rahovecit në përgjithësi. Në mbledhjen e KPF-se unë kam parashtruar pyetjen që në këtë listë, a janë të përfshira të gjitha pronat gjegjësisht lokalet që ju ka kaluar afati i kontratës dhe kam marr përgjigje prej drejtorit se të gjitha janë të përfshira dhe nuk ka lokale tjera që ju ka kaluar kontrata e që nuk janë të përfshira në këtë listë mirëpo ajo çka desha tash të përkujtoj është se këto lokale afariste që kanë operuar deri tash, po më intereson a i kanë kryer obligimet të gjitha ndaj komunës deri në çastin për me shpall në ankand publik këtë punë, pra, i kanë kryer obligimet dhe nëse i kanë kryer obligimet, atëherë unë mendoj se ankandi është i qartë dhe nuk i jep përparësi askujt por do të ishte mirë që në një mënyrë apo tjetër me ju dhanë mundësi që të paktën me vazhdua punën këta pra thash për të gjithë ata që i kanë kryer obligimet ndaj komunës dhe kanë qenë të përgjegjshëm ndaj komunës. Faleminderit!

Fehmi Hoxha – Është mirë që ka ardhur ky propozim vendim i kryetarit për të diskutuar dhe ndërlidhet me lokalet komunale që i shfrytëzojnë pra janë bizneset e vogla artizanate. Unë do të ndërlidhem por paraprakisht drejtori është këtu, e pash në diskutim e sipër edhe në debat, që është munduar me u bo një ditë këtu edhe në këtë kohë të pandemisë që nuk më ka pëlqyer fare, për rregulloren për taksa dhe tarifa. Edhe aty ne paraprakisht para se të shkoj rregullorja, kemi marr vendim për lokalet ekzistuese ka 2 (dy) euro kemi marr vendim e jo për 4 (katër) euro edhe pse aty figuron përsëri 4 (katër) euro që me siguri është ndonjë gabim teknik kurse për lokalet të Palestra Sportive 4 (katër) euro. Pra edhe me kërkesë që unë e kam propozuar e që e ka mbështetur edhe kryetari kemi marr vendim për shumën 2 (dy) euro por që tani figuron 4 (katër) euro dhe që me siguri është gabim edhe që duhet të përmirësohet dhe këto do t'i japim sipas rregullores ekzistuese që e kemi ka 2 (dy) euro. Edhe unë propozoj pasi që çdo vit edhe kuvendarët merren

me këtë punë edhe ekzekutivi si dhe ata që merren me biznese që çdo vit të hapet ky ankand dhe propozoj në bazë të ligjit që është afatshkurtër deri në 15 vjet, që të shpallet ankandi për me ju dhanë bizneseve këto lokale deri në 15 vjet e jo për një vit qysh e kemi pasur deri tash. Pra, kemi mundësi 1-15 vjet të ju japim pra propozimi im është të ju japim deri në 15 vjet edhe të ndjekem procedurat e rregullta ligjore që janë përmes ankandit. Faleminderit shumë!

Munib Durguti – Faleminderit kryesues, unë e mbështes propozimin që përcaktohet për këto lokale, meqenëse numri i lokaleve nuk është i madhe siç e dha sqarimin drejtori në fjalë mirëpo ajo që desha me potencuar meqenëse ky material është shqyrtuar prej Komitetit për Politike dhe Financa. Do të ishte mirë që këso raste për dhënie në shfrytëzim qoftë pronë e paluajtshme, të dalin me një propozim të kuvendit p.sh. 1 deri 15 pra në këtë rast 15 vite si rekomandim nga Komiteti për Politike dhe Financa, pasi shumë rrallë na vjen ndonjë rekomandim nga Komiteti por vetëm po e kuptojmë se është shqyrtuar edhe atje. Tash prej atij shqyrtimi është mirë me dal edhe një rekomandim. Ne e kuptojmë se vendim nuk mundemi me marrë pasi është Kuvendi ai që merr vendim mirëpo në atë Komitet secili subjekt e ka përfaqësuesin e vet dhe e ka mandatin që në emër të subjektit del edhe me rekomandimin, kështu që në këtë mënyrë do ta thjeshtësojë edhe seancën e Kuvendit edhe diskutimet e mundshme në seancë. Përndryshe unë e mbështes propozimin për shfrytëzimin deri në 15 vjet. Faleminderit shumë.

Fehmi Cena - Unë mendoj që në kuvendaret duhet të jemi të pajtimit që kur është në pyetje prona shtetërore që të jepet në shfrytëzim qytetarëve tanë, pra, duhet të jemi gjithmonë pro kësaj sepse është edhe në interesin e qytetareve që të ushtrojnë veprimtari, që hapen vende të reja të punës dhe njëkohësisht edhe për komunën sepse arkëtohen të hyra dhe në këtë rast jemi që këto lokale afariste të jepen. Pajtohem edhe me shqetësimin e parafolëseve rreth obligimeve që i kanë kryer, pasi është një element shumë i rëndësishëm, se a i kanë kryer apo nuk i kanë kryer, mendoj që kur ato do të jepen në ankand publik, unë mendoj që njeri prej kriterëve kryesorë pikërisht duhet të jetë kjo pasi që ata që i kryejnë obligimet apo që i kanë kryer, sigurisht që kanë edhe përparësi, të vazhdojnë ta ushtrojnë veprimtarinë e tyre. Përndryshe, sa i përket asaj rreth afatit, ne si Komitet për Politike dhe Financa e kemi shqyrtuar këtë pikë dhe në njëfarë mënyre jemi dakorduar të gjithë me qenë sikurse në tekst që është aty për 10 vite. Ky është propozimi i ri, natyrisht që delegatet kanë të drejtë me dhanë propozime por duhet të ketë edhe një arsyeshmëri që ne pastaj të ndryshojmë atë vendimin që kemi pasur, se në njëfarë mënyre ne ju përfaqësojmë juve, kemi ra dakord për këtë, po ashtu është arsyetuar në njëfarë mënyre 10 vjeteshin tash shqyrtohet 15 - vjeteshin se a do të bëjmë kështu apo ashtu. Si do qoftë ne jemi dakorduar që të jetë 10 vjet.

Rasim Fazliu – Unë desha të jem i singertë, drejtori në mbledhjen e KPF-së kur e ka sjellë vendimin, e kishte cekur aty 10 vite afat. Edhe unë mandej si anëtarë i KPF-së e kam dhënë vërejtjen time, pasi jemi ne ata që e caktojmë afatin e jo ju sigurisht në mënyrë kolegjiale edhe tani drejtori nuk e ka shkruaj, vetëm e ka cekur në bazë të ankandit prej 1-15 d.m.th. në KPF na ka ardh për 10 vite mirëpo unë i kam dhënë vërejtje drejtorit se ti nuk mundesh me caktua afatin por ne jemi ata që e caktojmë. Por, tash nuk na prish punë neve, dakordohemi të gjithë si është më së miri, ky është propozimi i z. Fehmi Hoxhës për 15 vite dhe nëse të gjithë mendoni se është mirë atëherë i japim për 15 vite, por, shumica duhet të vendosim dhe të dakordohemi por në KPF nuk kemi thënë për 10 vite por vetëm ka qenë propozim i drejtorit. Faleminderit!

Rukije Krasniqi – Faleminderit kryesues, lidhur me pronat e bizneseve të cilët janë komunale, nëse i caktojmë një afat 15 vjeçar atëherë çka nëse biznesi dështon, kur dihet se afatin e ka 15 vjet do të thotë me ja zgjat afatin. Atëherë çka ndodh me atë biznes, me atë pronë komunale, a e lëshon pronari që e ka biznesin me qera apo i kalon drejtpërdrejt komunës. Faleminderit.

Kryesuesi – Faleminderit shumë zonja Krasniqi, pra është vërtet se në mbledhje të KPF-së ka ardhur si propozim prej drejtorit deri në 10 vite, që ndoshta edhe ky i ka planifikuar ato arsye e veta, gjithsesi sot e patëm edhe një propozim tjetër nga asambleisti z. Fehmi Hoxha që propozoi për 15 vite.

Fatmir Iska – Faleminderit Rukije, për më shumë përgjigjen e ke, nëse e keni lexuar vendimin e që ndoshta edhe nuk e keni lexuar, në pikën 8 edhe thotë kështu: Prona e paluajtshme në fjalë nuk e ndërron titullarin juridik, pronari i saj në këtë rast Kuvendi Komunal i Rahovecit dhe si e tillë ajo nuk mund t'i jepet personit të tretë në shfrytëzim pra kjo është esenca.

Kryesuesi – Atëherë faleminderit shumë të nderuar kolegë kuvendarë, e qesim ne votim pikën e pestë të rendit të ditës, për dhënien në shfrytëzim për 10 vite. Konstatoj se me 3 abstenime aprovohet pika e pestë e rendit të ditës. Kalojmë në pikën e gjashtë të rendit të ditës:

6. Shqyrtimi i raportit të DKA-së për ecurinë e zhvillimit të mësimin online/ në distancë.

Avni Morina – Faleminderit kryesues, i nderuar kryetar, nënkryetar, drejtorë, kuvendarë të nderuar dhe gjithë ju të pranishëm në sallë. Unë kam përgatitur një raport që përfshin një periudhë 2-mujore pra nga 12 marsi deri me 12 maj të këtij viti, që është në kuadër të aktiviteteve që ka pasur DKA-ja dhe shkollat gjatë periudhës së pandemisë. Sikur në të gjitha komunat e Kosovës ashtu edhe në komunën tonë, pas rrethanave të jashtëzakonshme të krijuara për shkak të përhapjes së pandemisë COVID-19, edhe në komunën tonë filluam të angazhohemi t'i zbatojmë rekomandimet e MASHTI-t për mësimin në distancë/online. Në bazë të raporteve të SHFMU-ve dhe SHML-ve, të komunës së Rahovecit, në periudhën prej 12 marsit 2020 mësimi online është realizuar në nivel jo mjaftueshëm të kënaqshëm, marrë për bazë faktin se një sistem i tillë mësimi është realizuar për herë të parë dhe në rrethana të jashtëzakonshme. Gjatë kontakteve që kemi pasur me drejtues të shkollave dhe me numër të madh të mësimitdhënësve, kjo sfidë fillimisht është pritur me skepticizëm dhe rezervë, por me angazhimin e DKA-së dhe drejtorëve të shkollave e sidomos të koordinatorëve të cilësisë, ky skepticizëm është kthyer në angazhim të madh duke e dhënë kontributin e tyre shumica e mësimitdhënësve. Kjo punë është fuqizuar me krijimin e grupeve të klasave nga ku mësimitdhënësit kanë përcjellur angazhimin e nxënësve përmes detyrave të dhëna gjatë mësimin online, por edhe aktiviteteve të mësimitdhënësve në klasat e tyre dhe lëndët e caktuara. Njëra ndër sfidat sipas mësimitdhënësve ka qenë mungesa e pajisjeve teknologjike nga një numër i nxënësve me theks të veçantë me nxënës të familjeve si raste sociale dhe të komuniteteve RAE. Megjithatë, mësimitdhënësit nga shkollat tona kanë evidenca të sakta për secilin nxënës dhe mësimitdhënës dhe këto evidenca do të na shërbejnë edhe për procesin e vlerësimit të nxënësve, bazuar në U.A të MASHTI-it.

Të dhënat e mëposhtme për angazhimin e mësimitdhënësve dhe nxënësve në procesin e mësimin online, për aplikacionet që ata i kanë përdorur, për numrin e orëve të mbajtura, për lëndët mësimore dhe për sfidat e vështirësitë që kemi pasur, janë paraqitur në mënyrë tabelare për të gjitha shkollat dhe për të gjitha nivelet.

Këtu në raport e keni tabelën, ky është një dokument voluminoz sepse ka të dhëna për të gjitha shkollat e Komunës dhe në këtë tabelë unë po i paraqes sipas shtyllave të dhënat që i kemi paraqit për secilën shkollë. Në shtyllën e parë janë emrat e shkollave, në shtyllën e dytë janë platformat që i kanë përdorë mësimitdhënësit dhe nxënësit, në shtyllën e tretë është numri total i nxënësve në shkollë që janë në secilën shkollë, në shtyllën e katërt është numri i nxënësve të angazhuar, në shtyllën e pestë është numri i mësimitdhënësve në nivelin përkatës të angazhuar dhe në shtyllën e gjashtë është numri i orëve të mbajtura, lëndët mësimore që ka pasur aktivitete dhe në shtyllën e fundit pra të shtatë ka të bëjë me sfidat, vështirësitë e aplikimit të mësimin online në distancë. Këto tabela fillojnë nga niveli zero që përfshihet nga niveli parashkollor pastaj fillon me nivelet tjera si nga klasa e parë deri të pestën, niveli tjetër është klasa e

gjashtë deri të nëntën dhe niveli i fundit është klasa e dhjetë deri në klasën e dymbëdhjetë. Këto janë të dhëna për secilën shkollë, numri i nxënësve dhe numri i arsimtareve të angazhuar dhe lëndët, po ashtu kemi vërejtur se sfidat dhe vështirësitë kryesore të aplikimit të mësimin online kanë qenë shkathtësitë teknologjike nga mësimdhënësit pra mungesa e shkathtësive teknologjike të disa mësimdhënës, adaptimi me sfidat e reja si nga nxënësit ashtu edhe nga mësimdhënësit, pjesëmarrja e nxënësve, vlerësimi që është një prej sfidave kryesore, natyra e lëndëve sepse jo në të gjitha lëndët ka pasur mundësi të zhvillohet mësimi online, mungesa e teknologjisë informative e kështu me radhë. Tek lëndët mësimore jemi munduar që të i përfshimë lëndët kryesore të cilat janë sipas niveleve duke filluar nga gjuha amtare, matematika, gjuhe angleze, liria dhe shoqëria pastaj edhe lëndet tjera ku kemi cekur sipas niveleve, duke filluar nga niveli i shkollës të mesme fillore të ulet në shkollat e mesme të larta janë të përshkruara të gjitha lëndet në të cilat kanë marr pjesë mësimdhënësit dhe nxënësit e mësimin online. Aty ku ka pasur nevojë me të madhe të lendeve nuk kemi mundur me i përfshije të gjitha në këtë tabelë por i kemi shkruar të tjera sidomos te shkolla e mesme e lartë. Pra në këtë raport që edhe ju e keni, i kemi të gjitha të dhënat për secilën shkollë. Pas analizës që kemi bërë në DKA për angazhimin e mësimdhënësve dhe lendeve pas këtyre shtyllave, kemi nxjerrë disa përfundime të cilat i kemi në fund këtu, unë këto i kam thënë edhe në mbledhjen e KPF-së por atë ditë nuk i kemi pasur të dhënat për numrin e mësimdhënësve të paangazhuar në këtë sistem, siç shihet nga tabela gjatë periudhës së pandemisë numri i nxënësve që nuk kanë mundur të përfshihen në mësimin online nga niveli zero deri te klasa e dymbëdhjetë në gjithë komunën është 1674 nxënës ose shprehur në përqindje 17.6% e numrit të përgjithshëm. Sipas të dhënave që i kemi marr nga shkollat, numri i mësimdhënësve që për arsye të ndryshme nuk kanë mundur të realizojnë mësimin online është 63 mësimdhënës. Këto të dhëna i kemi marr prej drejtoreve të shkollave, arsyejet e mos përfshirjes janë të ndryshme nga natyra e lendeve që përmenda me herët, mungesa e teknologjisë informative jo vetëm tek nxënësit por edhe të mësimdhënësit. Ne jemi në bashkëpunim të vazhdueshëm me ministrinë e arsimit dhe prej 12 marsit kur janë mbyll shkollat dhe fillimi i mësimin online nga televizioni publik e pastaj përmes platformave, kemi qenë vazhdimisht në përputhje me rekomandimet që kemi marr nga MASHT-i. Kemi pasur kërkesa të ndryshme edhe nga shkollat edhe nga mësimdhënësit e nxënësit për furnizim me pajisje teknologjike mirëpo kemi pasur vetëm një ndihmë të vogël simbolike, një donacion që MASHT-it i ka dhuruar Elkos që për komunën tonë kanë qenë 13 laptop, prej tyre 2 kanë dal me dëmtime edhe jemi detyruar me i kthye kurse këta 11 i kemi shpërndarë neper shkollat e mesme për nxënësit e shkollave të mesme që kanë pasur nevojë me raste sociale. Pra me këto shqetësime jemi përballur gjatë këtyre ditëve ndoshta ne nuk mund të krahasohemi me Prishtinën sepse atje po raportohet se pjesëmarrja e mësimin online ka qenë afërsisht 95% por realiteti është sipas të dhënave gjithsesi po e theksoj që kam marr nga drejtoret e shkollave në nivel komune mospjesëmarrja është 17.6% që janë të pa përfshirë. Ne kemi pranuar edhe një udhëzues nga Ministria e Arsimit që këtu nuk e kam cekur sepse udhëzuesi nga Ministria e Arsimit ka ardhur pas datës 12 Maj, që sipas të cilit mësimdhënësit do të obligohen që ti vlerësojnë njohuritë e nxënësve edhe ata që kanë marr pjesë në mësimin online edhe atë pjesën tjetër që nuk kanë marr pjesë në mësimin online duke marr parasysh se kjo periudha e fundit është 1/3 e vitit mësimor që me të drejtë u deshtë të jetë 2/3 e vitit mësimor nga Shtatori deri tani dhe që ka mbetur 1/3 dhe duhet gjetur forma në përputhje me udhëzimet që ka dhënë edhe Ministria e Arsimit që mësimdhënësit të i përmbahen atij udhëzuesi dhe të i vlerësojnë nxënësit e tyre sipas këtij udhëzuesi. Siç po shihet nga zhvillimet e deritashme, vetëm në qoftë se brenda këtyre ditëve merret ndonjë vendim që të kthehen të paktën nxënësit brenda dy jave sepse maturantët e kanë krye mësimin online që sipas kalendarit ka përfundua me 20 Maj, vetëm nëse merret ndonjë vendim nga Ministria e Arsimit që do të kthehet përndryshe deri me sot nuk kemi ndonjë vendim që të kthehemi neper shkolla. Veç gati jemi në përfundim sipas kalendarit të procesit

mësimor mirëpo ne po presim tash edhe rekomandimet nga MASHT-i dhe do të i zbatojmë ato rekomandime sipas konsultimeve që merren në terenë. Faleminderit për vëmendjen, nëse keni ndonjë pyetje, unë do të jem këtu te ju përgjigjem.

Kryesuesi – Faleminderit shume drejtor për sjelljen e këtij raporti dhe informimin që edhe në komunën tonë, që unë do të i përgëzoj nga këtu të gjithë ata mësimdhënës që janë angazhuar, sigurisht edhe ata nxënës edhe ata tjerët që nuk janë angazhuar.

Sali Sallteku – Unë konsideroj se mësimi në distancë nuk është mbajtur as 50% për shkak se nuk kanë dashur, sepse ka qenë e pamundur, pasi shumë kush prej familjarëve nuk ka mundësi, bile tash kam menduar që kjo qeveri që shkoi ka lënë shume pasoja të mëdha sepse nëpër fshatra ka pasur mundësi të mbahet edhe mësimi e që ndoshta në qytet ka qenë më e vështirë, edhe tash që kjo qeveri që vjen edhe fillon punën që të paktën dy javë. Tash jam i bindur që ky mësim në distancë ka lënë pasoja shumë të mëdha sepse nuk kemi ende një nivel të tillë për punë. Tani po shpresojmë që të paktën dy javë të mbahet mësimi pasi edhe me formimin e qeverisë së re do të ndërmerren masa për fillimin e mësimi.

Rasim Fazliu – Faleminderit kryesues, unë do të fokusohem kryesisht rreth informatës për dhënien e raportit që na dha drejtori i arsimit të cilin e falënderoj shume. Unë mendoj që në situatën që u gjend Kosova dhe e tërë bota, ka qenë një situatë shumë e rëndë, prandaj, është shumë për t'i vlerësuar edhe Ministrinë e Arsimit edhe drejtorin tonë të arsimit për angazhimin që kanë bërë rreth mbajtjes gjallë të arsimit në Kosovë për gjatë kësaj kohe të shkurt, ku është kryer një punë me të vërtetë shumë e madhe, dikush ndoshta edhe mundet me thënë që nuk ka qenë efektive dhe ne që jemi mësimdhënës mjafton që nxënësit i kanë përcjellë temat, mësuesi ju ka dhënë detyrat dhe ata me pastaj ka 2-3 orë janë angazhuar rreth kryerjes së atyre detyrave dhe për mua kjo ka qenë një shumë e madhe dhe nuk i ka lejuar që nxënësit me dal jashtë situatës apo me dal rrugëve edhe me bo probleme, prandaj me të vërtetë duhet t'i falënderojmë edhe ministrinë edhe drejtorinë këtu, sepse është kryer një punë e mirë. E sa i përket asaj se sa është nxënë apo nuk është nxënë, njeherit tek e fundit e dini se edhe në mësimin e rregullt që e kemi mbajtur vazhdimisht kemi pasur gjithmonë vërejtje sepse gjendemi në kohë pandemie edhe nuk ja vlen me cekë atë se sa ka qenë vështirë me punua mirëpo për mua është bërë një punë shumë e madhe kështu që nuk mbetet tjetër përpos me i falënderua edhe këta që kanë bërë organizimin por edhe mësimdhënësit që të gjithë që janë angazhuar në mësimin online. Faleminderit!

Fahrie Lushi – I nderuar kryesues, të nderuar kolegë këshilltar, edhe ne e falënderojmë drejtorin për këtë informatë e cila në saktësinë e saj përfshin gjithë zhvillimin e procesit të mësimi online mirëpo kjo është një përvojë e re për të gjithë e sidomos për prindërit të cilët për mbi 3 ore punojnë pas mësimi online i cili organizohet për vetëm 35 minuta, e kam fjalën për fëmijët e ciklit prej klasës së parë e deri në klasën e pestë ndërsa ajo që është për tu shqetësuar e që vlen për tu përmendur, angazhimi i mësimdhënësve në këtë proces sepse edhe në KPF e kam përmend këtë dukuri p.sh. e kemi te shkolla "Isa Boletini" dhe unë i kisha sugjerua drejtorit pasi që e kemi përmend numrin total të nxënësve edhe po ashtu edhe numrin e nxënësve të angazhuar, do të kishim përmend përpos numrit të mësimdhënësve të angazhuar do të kishim vendos këtu edhe numrin e mësimdhënësve përgjithësi në shkolla pra do të ishte pasqyrë e saktë dhe nuk do të kishte as hapësirë për ndonjë mesazh edhe jo të këndshëm për mësimdhënësit, edhe pse këtu te shkolla "Isa Boletini" prej 1-5 e kemi 23 ndërsa te cikli prej 6-9 e kemi 12 mësimdhënës. Po e përmendi këtë shkollë por është edhe shkolla tjetër "Bekim Sylka" që te cikli prej 1-5 kemi 10 mësimdhënës po ashtu te cikli 6-9 kemi 10 mësimdhënës, janë edhe disa shkolla të tjera dhe do të ishte mirë që ta kemi numrin e mësimdhënësve të cilët janë në tërësi neper shkolla, nuk dua t'i fyej apo t'i bëj të ndihen keq

mësimdhënësit mirëpo nga kjo ne do ta dinim edhe nivelin e arritjes së mësimdhënies nga ky proces i mbajtjes së mësimi online. Faleminderit!

Ali Zhuniqi – Përshëndetje për të gjithë, unë deshta vetëm një replike në lidhje me Sali Salltekun, mendoj se çasja e tij ishte absolut jo konstruktive dhe nuk është mirë me i përzije politikat qendrore me ato lokale, tek e fundit i gjithë menaxhimi që është bërë edhe nga Ministria e Shëndetësisë edhe nga Ministria e Arsimit janë marrë nga direktivat dhe komisionet të cilat janë krijuar prej organizatës botërore të Shëndetësisë në menaxhimin e pandemisë. Kjo ka qenë pandemi globale edhe kisha sugjerua me qenë më konstruktiv në këtë pjesë e aq më pak me komentua edhe protestën në një seancë të tillë, mirë do të ishte me diskutua problemet lidhur me këtë raport që është bërë nga drejtori i arsimit, që ne i dimë se cilat kanë qenë problemet, unë edhe vetë i kam pasur fëmijët e vëllaut që e di edhe komunikimin me arsimtarët që i kanë bërë por është një përvojë e re në gjithë botën dhe nuk është mirë me komentua edhe kisha sugjerua me qenë konstruktiv në lidhje me këtë çështje e aq më pak me përzije edhe pikën e rendit të ditës.

Sali Sallteku – Unë nuk kam asgjë kundër z. Zhuniqi, vetëm se i përmenda gjërat e politikës qendrore e që po ndikojnë në ato lokale. Është diçka që është parë dhe që ka ndikua shume keq në qeverisjen e tij.

Munib Durguti – Faleminderit kryesues, e falënderoj drejtorin e arsimit për sjelljen e kesaj informate rreth zhvillimit të mësimi online gjatë kohës së pandemisë dhe të gjithë pajtohemi se ka qenë një sfidë dhe një përvojë e re mirëpo ajo që ka qenë shqetësuese për mua është mos përfshirja e një numri të konsiderueshëm të mësimdhënësve pa arsye për faktin se kemi pasur të tillë që janë në moshe të re dhe kanë qasje në teknologji dhe u ndie një mungesë e komunikimit me DKA-se dhe drejtorët e shkollave që fare nuk kanë qenë të angazhuar në këtë proces. Drejtori tha që ka qenë numri 63, që pajtohem me atë numër mirëpo për mua është shqetësuese kur e presin nxënësit dhe ai nuk kyqet, që kemi pasur raste të tilla. Pyetja për drejtorin është se sa jeni angazhuar për me i trajnuar këta arsimtar, nëse ka qenë ankesa se nuk din me i përdor teknologjinë informative, a keni mundur me pas trajnime të tilla në sallën e kuvendit apo shtëpinë e kulturës duke përfshirë IT-të e komunës pastaj njohësit e teknologjisë për këshilla eventuale. Për neve është shume e dhimbshme që numri 17.6% i nxënësve nuk janë kyçur në asnjë proces dhe ata janë përgjegjësi të prindërve ndërsa arsimtarët në përgjegjësi të komunës gjegjësisht të DKA-së. Faleminderit!

Rukije Krasniqi – Faleminderit kryesues. Unë dua të flas vetëm për organizimin e mësimi online dhe të mos dalim jashtë temës sikur kolegët më parë. Organizimi i mësimi gjatë pandemisë mendoj se ka qenë jashtëzakonisht i mirë nëse e krahasojmë me kushtet që i kemi pasur nëpër familjet tona, e aq më tepër duke ditur numrin e nxënësve/të fëmijëve që i kemi në familje. Ndodh që 2 apo 3 fëmijë i kemi në shkollë dhe kemi një mjet teknologjik/telefon/laptop e ka apo nuk e ka fare atë. Do të thotë që me mundësitë dhe kushtet familjare që kanë në familje, prindërit kanë bërë çmos që të realizohet një mësim i tillë online në distancë. Kjo vlen me përmend që edhe fëmijët kanë qenë mjaft të interesuar por një falënderim të veçantë duhet të ju dërgohet edhe prindërve. Sa i përket mësimdhënësve, kemi edhe mësimdhënës që nuk din të përdorin teknologjinë edhe nuk kanë formë apo mënyrë tjetër se si me ju qasë atij projekti që duhet të realizohet në mënyrën e duhur sepse kemi mësimdhënës afër pensionit edhe ata nuk dinë edhe formën si me ju qasë apo platformën tjetër si me MSN apo facebook të cilat janë përdor. Po ashtu ka mësimdhënës që këto forma të komunikimit nuk din edhe me i përdor por shumica e mësimdhënësve pra pjesa dërrmuese të mësimdhënësve duke përfshirë edhe lëndët e shkathtësisë, edukatën fizike kulturë muzikore e kanë arrit vetëm nëpërmjet këtij mësimi online. Pra ishte fjala për mësimdhënësit e Isa Boletinit, nuk e di se për çfarë informata bëhet fjalë dhe nga i kanë marrë, ku çdo kush duhet të niset nga shkollat e veta. Unë si mësimdhënëse e Isa Boletinit një numër i madhe i mësimdhënësve jemi të kyçur qysh në fillim, që

fillimisht jemi kyçur ne aplikacionin Viber sepse nuk kemi ditur platforme tjetër derisa pas dy jave na kanë informua nëpërmjet zoom-it. Menjëherë kur kemi qenë të informuar dhe kemi mësuar praktikën e zoom-it atëherë kemi filluar me mësimin, me detyra me pyetje me të gjitha vlerësimet atëherë në mënyrë të rregullt duke përjashtuar mësimdhënësit e vjetër apo të cilët ata ndoshta nuk i kanë pasur kushtet në shtëpitë e tyre. Po ashtu një falënderim përveç mësimdhënësve e nxënësve, një falënderim shumë i madhe shkon për prindërit që kanë qenë kokulur se bashku me fëmijët e tyre pranë ekraneve televizive apo mjeteve teknologjike për me realizua një mësim të tillë. Faleminderit!

Avni Morina – Faleminderit shumë të gjithëve për pyetjet dhe konstatimet që ne një formë të gjithë gjatë kësaj periudhe kemi jetua me fëmijët tanë dhe me preokupimet që i kanë pasur ata. Unë jam njëri prej jush dhe jam njëri prej prindërve dhe njeri prej mësimdhënësve të komunës sonë sepse edhe unë i kam 4 fëmijë në familjen time pra dy studentë dhe dy tjerë njeri në shkollë fillore dhe tjetri në shkollë të mesme dhe jam marr vazhdimisht me këtë problematike. Të them të drejtën shtëpia ime sikur edhe shumë të tjerëve që kanë fëmijë neper shkolla janë bërë thuajse qendra interneti, po ashtu një pajisje u deshtë me huazua te djali i axhës pasi nuk kam pasur për të gjithë fëmijët. Në këtë periudhë unë nuk mendoj që as 50 % nuk kanë marr pjesë por edhe kjo shifër që është raportuar prej drejtorëve të shkollave 17:6 % mendoj që është pak më e madhe e mos përfshirjes e që ndoshta mund të shkoj diku rreth 25% sepse nuk po them që nuk po ju besoj drejtorëve por këto janë shifra zyrtare që edhe nëse nuk janë të vërteta ose plotësisht të sakta këto do të verifikohen në ditët në vazhdim sepse ne do të kemi punë prapë dhe unë do të kërkoj prej drejtorëve të shkollave që secili mësimdhënës që nuk ka raportuar te drejtori i shkollës për mbajtjen e mësimin online duhet të gjej formë që të bëj vlerësimin e nxënësve apo t'i angazhoj ata për të vazhduar procesin d.m.th. përpjekja jonë do të vazhdoj pa marre parasysh sa janë shifrat. Po ju them edhe njëherë edhe po i përsëriti të dhënat që i kam marr pra të dhënat burimore prej drejtorëve të shkollave sepse ata për mua janë adresa e parë. Përveç që kam marr të dhënat në mënyrë elektronike, unë kam pasur edhe takime online me ata po ashtu edhe takime fizike edhe komunikime përmes telefonit. Fahrie Lushi pyeti për numrin total të mësimdhënësve në komunën tonë? Drejtorja e Arsimit e kemi cekur edhe në tabelë numri total i mësimdhënësve është aty për secilin nivele pra aty është e ndarë niveli, nga niveli zero deri te klasa e dymbëdhjetë dhe aty është numri total i mësimdhënësve ndërsa në baze të raportit që kam marr nga drejtorët e shkollave janë 745 mësimdhënës ne total dhe 63 janë që nuk janë angazhuar, që me përqindje i bien 8.45% e mësimdhënësve që nuk janë angazhuar. Arsyet se pse nuk janë angazhuar është sepse arsyet janë të ndryshme, por kryesisht ata që nuk janë angazhuar ose e kanë pasur lëndën e tillë sepse ne edukatë fizike nuk mund të angazhohesh në mësim online sepse shumica e plan programit në edukatë fizike është praktikë, shumë pak kanë teori edhe lëndët tjera si arti figurativ dhe unë i kam të specifikuar raportet e drejtorëve të shkollave që i kanë marrë prej mësimdhënësve tyre në secilën lëndë edhe cili nga mësimdhënësit nuk ka mbajtur mësim edhe unë do të kem përgjegjësi me këto shifra që mi kanë dërguar ata. Nuk pajtohem që dikush ndoshta edhe nuk u tregua i drejtë me mua, që sigurisht nuk do të pajtohem asnjëherë me atë sepse tek e fundit janë të detyruar secili mësimdhënës pa i vlerësuar nxënësit e vet qoftë a i kanë angazhuar apo nuk i kanë angazhuar në mësim online sepse e kanë udhëzuesin para vetës dhe Ministria e Arsimit ka kohë që ju ka dërgua udhëzuesin edhe ata duhet të veprojnë sipas udhëzuesit që e kanë marr nga Ministria e Arsimit. Nuk kemi mundur të mbajmë trajnim të atyre mësimdhënësve dhe unë kam vërejt që shumica e atyre mësimdhënësve që nuk kanë mundur të përfshihen në mësim online kanë qenë gjeneratë e vjetër pra afër pensionimit shumica prej tyre por edhe sikur të kishte një iniciativë të tillë për trajnim në këtë periudhë edhe DKA-ja ka pasur stafe të reduktuar. Sikur edhe çdo drejtori tjetër, unë për veti në dy javët e para të pandemisë, vetëm Admir Durgutin e kam pasur aty pasi asnjëri prej tjerëve nuk kam pasur sepse e kemi pas reduktua stafin në atë periudhë edhe s'kemi mundur të bëjmë organizime të

tillë e asesi të mbajmë tubime për trajnime pra e kemi ditur që ka nevojë por nuk kemi mundur.
Faleminderit

Fatmir Iska - Unë po e falënderoj drejtorin e Arsimit, njëkohësisht po e shfrytëzoj rastin me i falënderuar të gjithë arsimtarët, pra profesorët e komunës tonë që kanë dhënë kontributin e tyre duke kuptuar që shqetësimet mundën me qenë të vogla por gjithashtu falënderoj edhe prindërit, që në njëfarë mënyre u deshtë me qenë pak më shumë të angazhuar në këtë proces, gjithsesi i falënderoj të gjithë për kontributin që kanë dhënë gjatë kohës së pandemisë. Faleminderit!

Kryesuesi – Faleminderit shumë nënkryetar, të nderuar kolegë kuvendarë, ju falënderoj të gjithëve për kontributin e dhënë dhe shihemi në mbledhjen e radhës.

Mbledhja përfundoj në 12:00

01 Nr. 78/20
Rahovec, 29.06.2020

Procesmbajtësi:


Agim Hoti

